



Menntamálaráðuneytið
Þorgerður Katrín Gunnarsdóttir
menntamálaráðherra
Sölvhólgötu 4
150 Reykjavík

Reykjavík, 22. ágúst 2007
Tilvísun: HI07060085/005.1

Efni: Viðbrögð Háskóla Íslands við lokaskýrslum sérfræðinganefnda vegna umsóknar HÍ um viðurkenningu

Vísað er til þriggja bréfa ráðuneytis sem fylgdu lokaskýrslum sérfræðinganefnda (sem trúnaðarmál) vegna umsókna Háskólans um viðurkenningu fyrir fræðasvið náttúruvísinda (bréf dags. 18. júní 2007), verk- og tæknivísinda (bréf dags. 27. júní 2007) og hugvísinda (bréf dags. 28. júní 2007). Í bréfum ráðuneytis var óskað eftir því að athugasemdir - ef einhverjar eru - berist ráðuneyti innan fjögurra vikna frá dagsetningu bréfs. Vegna sumarleyfa sem í hönd fóru var fresturinn rýmkaður til 22. ágúst.

Fyrir hönd Háskóla Íslands er starfsfólki menntamálaráðuneytisins sem að málinu kom færðar þakkir fyrir gott samstarf um þetta verkefni og sömuleiðis starfsfólki RANNÍS og erlendu sérfræðingunum sem skipuðu matsnefndirnar og settu saman skýrslurnar um fræðasviðin.

Þær deildir Háskólans sem hlut áttu að máli voru raunvísindadeild vegna náttúruvísindasviðs, verkfræðideild vegna verk- og tæknivísindasviðs og hugvísindadeild og guðfræðideild vegna hugvísindasviðs. Viðkomandi deildir Háskólans áttu þess kost að gera athugasemdir og setja fram ábendingar við drög að matsskýrslum á fyrri stigum umsóknarferlisins. Flestar þessara athugasemda og ábendinga voru teknar til greina. Ekki er talin ástæða til þess nú, er lokaskýrslur liggja fyrir, að gera sérstakar athugasemdir við efni skýrslanna umfram það sem fram kemur í meðfylgjandi bréfum deildanna.

Vinnan við undirbúning umsókna um viðurkenningu var í senn umfangsmikil og gagnleg og mun eðli máls samkvæmt nýtast í starfi Háskólans. Þannig er til dæmis gert ráð fyrir því að ekki verði látið staðar numið við lýsingu á inntaki námsleiða og prófgráða, sbr. 8. hluta, heldur verði gerð samsvarandi viðmið um einstök námskeið sem saman mynda námsleiðina. Í mörgum tilvikum hefur það reyndar verið gert samhliða, þótt það komi ekki fram í umsókninni, enda ekki ráð fyrir því gert.


Ábendingar um starfsemi fræðasviðanna sem fram koma í skýrslunum komu í langflestum tilvikum ekki á óvart. Allar ábendingar og athugasemdir verða vandlega yfirfarnar í samvinnu við viðkomandi deildir og brugðist við þeim eftir því sem kostur er. Háskóli Íslands hefur á undanförunum fáum árum gengist undir nokkrar ytri úttektir sem ýmist hafa tekið til Háskólans

í heild eða einstakra deilda hans. Skýrslur um þrjár slíkar ytri úttektir voru birtar á árinu 2005, þ.e. úttekt Ríkisendurskoðunar á fjárhagsstöðu, fjármögnun, árangri, gæðum, rekstrarformi og stjórnsýslu Háskólans, úttekt menntamálaráðuneytis á akademískri stöðu Háskóla Íslands, sem tekur til rannsóknastarfs við skólann á árunum 1999–2002, og úttekt Samtaka evrópskra háskóla (EUA) þar sem lögð er sérstök áhersla á uppbyggingu framhaldsnáms og gæðastarf innan skólans. Þá hafa nýlega verið gerðar ytri úttektir á hugvísindadeild (skýrsla 2006) og raunvísindadeild (skýrsla 2007).

Allar þessar úttektir hafa í reynd staðfest mjög sterka stöðu Háskólans sem kennslu- og rannsóknastofnunar. Þær hafa nýst vel í starfi skólans og rennt stöðum undir stefnu Háskóla Íslands 2006-2011 sem samþykkt var á háskólafundi 5. maí 2006 og staðfest af háskólaráði 11. maí 2006.

Í kjölfar þeirrar stefnumörkunar var hinn 11. janúar 2007 undirritaður samningur á milli menntamálaráðuneytisins og Háskólans um kennslu og rannsóknir sem gildir til ársloka 2011. Samningurinn geymir helstu áherslur í starfsemi HÍ á samningstímabilinu og eru sameiginleg markmið samningsaðila að tryggja gæði kennslu og rannsókna við HÍ, stuðla að metnaðarfullri framþróun í starfsemi skólans á samningstímanum og að skapa forsendur fyrir því að HÍ öðlist viðurkenningu sem háskóli í fremstu röð í heiminum. Í samningnum kemur fram að HÍ muni aðlaga starfsemi sína nýjum lögum um háskóla á samningstímanum, m.a. að afla sér viðurkenningar á þeim fræðasviðum sem skólinn starfar á. Með þeim umsóknum sem fram hafa verið lagðar fyrir fræðasvið náttúruvísinda, verk- og tæknivísinda og hugvísinda sem nú hafa sætt mjög jákvæðu mati sérfræðinga telur Háskólinn sig hafa uppfyllt markmiðið fyrir þessi þrjú fræðasvið. Fyrir liggur að Háskólinn mun leggja fram umsóknir hinn 1. september nk. um viðurkenningu fyrir fræðasvið heilbrigðisvísinda og félagsvísinda.

Virðingarfyllst



Kristín Ingólfssdóttir
rektor

Menntamálaráðuneytið
Þorgerður Katrín Gunnarsdóttir
menntamálaráðherra
Sölvhólgötu 4
150 Reykjavík

Reykjavík, 21. ágúst 2007

**Viðbrögð raunvísindadeildar Háskóla Íslands við skýrslu sérfræðinganefndar um
viðurkenningu á fræðasviði náttúruvísinda.**

Raunvísindadeild gerir engar athugasemdir við lokaskýrslu sérfræðinganefndar menntamálaráðherra vegna viðurkenningar Háskóla Íslands á sviði náttúruvísinda og fagnar því að nefndin skuli mæla með því að deildin hljóti viðurkenningu á öllum þeim fagsviðum sem umsókn hennar náði til. Deildin þakkar sérfræðinganefndinni jafnframt fyrir vandaða og ítarlega úttekt á starfi deildarinnar og ýmsar gagnlegar ábendingar sem við munum taka mið af. Athugasemdir nefndarinnar ríma vel við stefnu Háskóla Íslands 2006 - 2011 og við stefnuskjal raunvísindadeildar fyrir sama tímabil.

Veigamestu ábendingar sérfræðinganefndarinnar lúta að aðbúnaði verklegar kennslu í tilraunavísindum, einkum hvað varðar sérhæfðan tækjabúnað, efniskostnað og stoðþjónustu. Deildin tekur undir athugasemdir nefndarinnar og telur brýnt að bæta tækjakost og fjölga tæknimenntuðu aðstoðarfólki við þessa kennslu og vill eiga gott samstarf við Háskólayfirvöld um að ná því marki.

Sérfræðinganefndin bendir á að stoðþjónustu sé einnig ábótavant á öðrum sviðum innan deildarinnar í samanburði við háskóla í nágrannalöndum. Fjölga þurfi starfsfólki í skrifstofustörfum við deildina og einstakar skorir til að gera akademískum starfsmönnum betur kleift að sinna rannsóknum og kennslu. Í stefnu Háskóla Íslands 2006-2011 er kveðið á um að endurskoða skuli skipulag og stjórnkerfi Háskólans og er sú vinna þegar komin vel á veg. Breytingunum er meðal annars ætlað að efla stoðþjónustu og gera stjórnkerfi skilvirkara.

Nefndin leggur áherslu á að öll akademísk störf við raunvísindadeild sem laus eru til umsóknar séu auglýst bæði innanlands og á alþjóðavettvangi. Deildin tekur heilshugar undir þetta sjónarmið og hefur þegar sett sér verklagsreglur í þessa veru.

Raunvísindadeild tekur undir áhyggjur sérfræðinganefndarinnar af miklu brottfalli frá námi við deildina. Þetta vandamál á einkum við um BS námið og nær út fyrir raðir raunvísindadeildar. Háskólaráð hefur skipað nefnd um inntöku nýnema og aðgerðir gegn brottfalli úr námi sem skila á tillögum fyrir lok árs 2007 en raunvísindadeild mun einnig fara yfir þau inntökuskilyrði sem deildin setur og leita leiða til að styðja betur við nýnema.

Sérfræðinganefndin leggur til að deildin efli námsleiðir í framhaldsnámi, einkum á sviðum þar sem hún er sterk fyrir og getur skapað sér sérstöðu í á alþjóðavettvangi. Nefndin bendir einnig á að hagræða megi með því að samnýta námskeið á mismunandi námsleiðum í BS námi í meiri mæli en gert er og að ýmis sérhæfð valnámskeið í BS námi beri að færa upp á meistarastig. Þessi atriði eru öll í samræmi við stefnu raunvísindadeildar og við leggjum áherslu á að þau komi til framkvæmda sem hluti af markvissri uppbyggingu framhaldsnáms og eflingu grunnnáms við deildina.

Virðingarfyllst,

Lárus Thorlacius, forseti raunvísindadeildar